

Aris per Bononienſes Bondonium venit . Hinc ſecundo 1439
 Pado impedimentis Clodiam miſſis , per Ferrariam paten-
 tibus portis Gorium ſe contulit : ex Gorio mox Hadriam
 tranſiit , unde proximus ſinus Hadriacus primo , inde Ha-
 driaticus nominatus eſt . Fuit id Thuſcorum oppidum ,
 atque diu præpotens . Verum nos hæc ideo admonuimus ,
 ne ab Hadria quæ in Picæno eſt , nomen mari inditum
 crederetur . Florentiſſimum hunc exercitum omnium ſpe
 celerius Venetæ opes in Patavinos fines traduxere quatuor
 ingentibus vadis , quibus erat transmittendus . Multis ſiqui-
 dem locis tractus ille littoralis , aut fluviis in mare emit-
 tentibus , aut maris æſtu perrumpitur . Ad Gorium primo
 ex fluminibus Padi unum ponte ſuperatum , quem duo &
 triginta longiores ſcaphæ anchoris fundatæ expleverunt :
 ſtrata erat aſſeribus pontis longitudo tenui ſabulo deſuper
 aſperſa ; perticæ hinc inde affixæ , ne motu pontis equi
 perterriti in ſubjectas aquas præcipitarentur , erantque ad
 illius præſidium duodecim naves ad pugnam inſtructæ ,
 quæ , ſiquis ſuperiore parte fluminis ab hoſte impetus factus
 eſſet , pontem ipſum ab injuria tutarentur . Ferunt his lo-
 cis Sforcianos pro prodigio habuiſſe , & quod Padus ita
 repente intumuerit , ut parum abeſſet quin , aggeribus re-
 fractis , caſtra , quæ non procul ab ipſo flumine metati
 fuerant , ſubita inundatione demerſerit : & quod vis in-
 gens ſerpentum ipſa militum tabernacula circumſederit .
 Alterum vadum ad Fornaces , quatuor & quadraginta lin-
 tres arctiſſimo nexu junctæ exhibuere . Hic locus , quia
 hoſtium inſidiis aliquanto opportunior fuit , duodecim
 galeones armis & propugnatoribus inſtructos habuit ; cen-
 tum ad id ſagittarii pontem præſidio tenuere . Tertius ad
 Atheſis oſtium circa Foſſiones quaternis viciſſis ſcaphis
 eſt compactus : quo ſuperato , ſecus maris littora ad Brun-
 dulum copiæ ſunt traductæ . Hac quoque trajectus exerci-
 tus : quia ampliſſimum erat vadum , ponte omnium lon-
 giſſimo nonaginta navibus expleto . Hinc ad portum ,
 quem Clodia Venetias verſus habet , Sforcia progreſſus ,
 trecenta navigia ad convehendas in continentem copias

1440